



Vitus natus est in Sueuia ex patritiorum gene-
 re Biberaci Imperij oppido anno 1500. Hic a
 pueris optimè educatus, bonis literis operam de-
 dit, & ob innatam quandam animi prudētiam ma-
 gnum sibi rerum usum comparauit. Accedebat &
 morum integritas, & rara dicēdi facundia. Itaq; pri-
 mò in senatum cooptatus, postea etiam Consul de-
 signatus, in præstantissimum patriæ ciuem euasit.
 Cum autem timore Dei afficeretur, Euangelij do-
 ctrinam facilè intellexit, atq; ut ea in patria publicè
 reciperetur, suis ciuibus cū paucis alijs (præsertim
 Iacobo Oegelspachio altero consule prudentissi-
 mo) author fuit. Quoniam uerò post bellum Smal-
 kaldicum Cæsar uictor esset, atq; in Augustanis comitijs 1548 noua doctrinæ
 & religionis forma, quam Interim dixere, Euangelicis Imperij statibus propo-
 neretur, Vitus consentire noluit, atq; plurima, summo uitæ & rerum suarū pe-
 riculo, pro patriæ libertate retinenda tentauit. Verùm cum sic perseueraret, u-
 nà cum Iacobo Oegelspachio collega uiro optimo, & alijs suis senatoribus E-
 uangelicæ religionis, loco moti fuerunt. Eam contumeliam illi patienter tulerunt,
 & in cognita ueritate, bona conscientia freti, perseuerarunt. Hoc modo
 uterq; consul etiamnum ueneranda canitie conspicui in patria degunt, & suis
 uirtutibus Ecclesiam Euangelicam eius ciuitatis plurimùm exornant. In pri-
 mis uerò dolendum, quod Vitus omni mascula prole careat, & suæ stirpis &
 familiæ ultimus existat. Con. Vuolff. Platz.